

ЖАҢАЛЫҚТАР

Министрлік КҚК мұнайын тасымалдайтын кемелерге жасалған шабуылды айыптады

19 шілде 2026 жыл, 23:19



Қазақстан сыртқы істер министрлігі 17 және 19 шілдеде Каспий құбыр консорциумының (КҚК) инфрақұрылымы арқылы мұнай тасымалдайтын азаматтық кемелерге жасалған шабуылды қатаң айыптады.

Ведомство шабуылды "Қазақстанның экономикалық мүдделеріне қол сұғушылық" және жаһандық энергетикалық нарық пен халықаралық логистикалық тізбектердің қауіпсіздігіне қатер деп бағалады.

"Қара теңіз акваториясына КҚК терминалдарында мұнай тиеу мақсатында кіретін азаматтық кемелер туралы ақпарат алмасудың барлық мүдделі тараптар бұрын келіскен тетігінің әдейі ескерілмегені ерекше алаңдаушылық туғызады. Бұл азаматтық кемелер экипаждарының өмірі мен қауіпсіздігіне қатер төндірді" деп жазылған хабарламада.

CIM шабуылдарды дереу тоқтатуды және қазақстандық мұнай экспорты инфрақұрылымының қауіпсіздігін қамтамасыз етуді талап етті. Қазақстан келтірілген залалды өтеу туралы талап қою құқығын өзінде қалдырды деп жазылған мәлімдемеде.

19 шілдеде украин дрондары Новороссийск түбінде КҚК терминалына шабуылдаған. Компанияның хабарлауынша, екі танкер зардап шеккен: Либерия туын іліп алған ASIA және Маршалл аралдары туын ілген NISSOS IOS кемесі.

Шабуыл шикізатты тиеу кезінде болған, тиеу жұмыстары тоқтатылған. Соққының салдарынан ASIA кемесінде өрт тұтанған. Кейін өрт сөндірілген.

Компанияның хабарлауынша, терминал экипажы мен қызметкерлері арасында жараланғандар мен қаза болғандар жоқ. Мұнай төгілмеген. Оның алдында екі күн бұрын да соған ұқсас оқиға болған.

Ресей аумағындағы Ресей, Қазақстан және батыс компаниялары қатысатын халықаралық консорциум нысанына алғаш рет соққы жасалып отырған жоқ.

Былтыр қараша аяғында Новороссийскіде Қазақстан мұнайының 80 пайыздан астамын экспортқа шығаратын Каспий құбыр желісі консорциумының (КҚК) теңіз терминалына экипажсыз катерлер шабуылы зақым келтірген еді. Шабуылдың салдарынан теңіз танкерлеріне мұнай құйылатын үш айлақ құрылғысының бірі істен шықты. Құрылғы бірнеше айдан кейін ғана қалпына келген еді.

Қазақстан билігі сол кезде мәлімдеме таратып, КҚК инфрақұрылымына жасалған шабуылды айыптаған. Желтоқсанда Қазақстан CIM-інің мәлімдемесіне реакция білдірген Украина шабуыл Қазақстан немесе басқа да үшінші елге қарсы бағытталмағанын, Ресейдің ауқымды басқыншылығын тойтаруды көздейтінін айтқан.

ОҚИ ОТЫРЫҢЫЗ

- КҚК теңіз терминалындағы жоспарлы жөндеу жұмысы аяқталғанын хабарлады
- КҚК-ға шабуыл жайлы жазбалардан терроризмге шақыру белгілері анықталған жоқ - Балаева
- Қара теңізде Қазақстан мұнайын күтіп тұрған екі танкерге дрон шабуылдады - Reuters
- Қазақстанда Каспий құбыр желісіне шабуылды қолдау дерегі бойынша қылмыстық іс қозғалған
- Депутат украин дрондарының КҚК-ға шабуылын қолдаған қазақстандықтардың жазбаларын тексеруді сұрады
- Министрлік: Қазақстан КҚК-ға шабуылдан 480 мың тонна мұнайын жоғалтты

Айдар

ЖАҢАЛЫҚТАР

ЖАЛПЫ АРХИВ